



Herremättli-Clique

Sujet 2004

S'wird alls wie haisser.....

Mir lyyde under Hitzschlaag-Gfoor
und kemme-n-is wie Pinguins in dr Wieschi voor.
S'Glyyma veränderet sich dramaatisch,
vor luter Hitz wird me ganz apaathisch.

No-n-em kalte Grieg und dr allgemaine Yszyt
hett me gmaint, es syg jetz äntlig eso wyt:
Friide, Fraid und Aierkueche.....,
nie me gäb's e Grund zem Flueche.
Aaber doo sinn mir jetz bees dernääbe,
vor luter Hitz blybsch verdeggel glääbe.

Maischtens ischs zwoor numme haissi Luft
wo iiber unsere Kepf verpufft.
An ainige Oorte wird's aaber haisser g'ässe,
kasch es nit aifach abheeggle und vergässe!

Dr Cowboy Schorsch Dubelijuu und s'Blairs iire Tony,
die haissi Liebi isch au nit ganz ooni.

Die Beziehig zwische-me Rächte und em e Lingge,
haut is aaber glatt uss de Fingge.

Mit em e Fyyrwärgg starte si e Fescht.

Si hätte gärn no zwai, drey Gescht.

S'wird zinserlet und aabebrennt,
s'isch e megahaiss Ywent.

Au dr Jaques und dr Gerhard hänn e-n-Yylaadig bikoo,
si hänn aaber baidi nit welle goo.

E flotte Vierer syg iine z'haiss,
wääge dr Aasteggigsgfoor, wie me jo weiss!

Gärn mitmache wurd hingeege dr Berlusconi.

Är hett's aaber eenter mit em Schorsch als mit em Tony.

“Cali-” kunnt vo haiss und “-fornia” vo Oofe.
Dr ney Governor deert, das isch e doofe.....
Dr Noldi als politische Terminator,
das kunnt uns zimlig “cali-” f(v)or!

Im Juni drifft au d'Schwyz die erschti Hitzewälle.
Bim G8-Gipfel goots männigem Aggtivischt an d'Schälle.

Ääne, dääne, disse,
dr Couchepin, dä hett gschisse.
Was isch derbyy ächtscht haisses uusekoo?
Mir sotte bis 67 go schaffe goo!

E haisse Tipp steggt d'Metzlere em Couchepin yyne.
Haissi Kurde-Connegtschens haig d'Micheline.
Dä Schuss isch aaber hinde-n-uuse.....
D'Micheline blybt drinn, aaber s'Ruthli fliegt uuse!

Im Bundeshuus het me d'Granggekasse aifach gärn
und im e-n-e haisse Fieberwahn in Bärn
setzt me dr Rabatt aabe und d'Franchise uff.
So kenne d'Kassene no meh Gäld verpuffe!

Au z'Basel lyydet me under dr Hitz,
aaber nit numme im Summer, das isch kai Witz!
S'git Drämmler, die lyyde sogaar no im Jänner
und faare um d'Schlaufe, was hesch, was gänn-mer,
ohni Ruggsicht uff Verluscht und Schääde,
als gieng's ums bludde liberlääbe!

E haisse Kopf het glaub au d'Schnyyder Barbara,
bim Usdängge vo dr Abfall-Grundgebyyr ghaa!?

Im Waaghoof sinn, das isch kai Witz,
d'Muure brichig, vor luter Hitz.

Uff aimool isch's wiider vo Basel bis Laufe
haiss, wenn de Hanf duesch verkaufe.
Duesch en nur paffe, bisch hingeege megacool.
Mir finde die Leesig irgendwie fuul.....

S'haig gmotted, maint me bim Schaulaager amme,
bim Grand Casino hingeege stieng alles no in Flamme!

Und dr Hakan isch haiss gsi uf die wyti Wält,
är hett allwäg draimt vom no greessere Gäld.

Wyyl am Rhy isch schyynt's haiss uff e-n 1. Auguscht,
oder isch das ebbe numme dr Frangge-Gluscht?

Wieso nit e Härdepfelreeschti fir d'Fyyr bi de Praise?
Das elai isch noonig e haisse.
Aaber aini mit Läggerligschmagg isch doch zem gaisse.

Dr ney Schwimmsagg dä het Hoochkonjunggduur,
Wie lang no, das frooge mir uns nuur!?
Wenn's no lang so haiss duet blyybe,
d'Flussbett ussdroggne und d'Gwelle versyyge,
isch glyy feertig mit im Rhy goo loo dryybe.
E Sandbaad wird is als ainzigs no blyybe!

An dr Ziircher Goldkischte gitt's haissi Oore,
si hänn nämmlig geege d'Schwoobe verloore.
Ganz Ziiri duet schyynt's drunter lyyde.
Z'Klote lande si drum jetz vo Syyde.

Die ney Miss Schweiz isch au ganz e haissi,
vor allem wenn sii s'Muul uffmacht, das waiss si:
"Ich bin aufgewaxt in Kanada,
fidibumms und trallallaaa....."
Hauptsach sii isch e haissi und e nätti,
die näggscht e Polin, maint dr Ätti.

Haiss isch im Felix Kurt si Verriss an unsrer Wätterfee.
No haisser wär's, syni Gryte an dääre Stell z'gsee!

Und zem schlächte Schluss,
grad noo-ne haisse Stuss.....

Fluumer, Fääger, Glopfer oder ebbe Bäasestiil,
und Jänner, Hoornig oder April?
Die baide neye Bundesreet find ych soo haiss,
ass ych nit emol me iiri Nämme waiss.....

Vyyl besser als e Fluumer wär zem Wäädle e Fächer
und zem Kippe-n-e kiele Bächer!
Numme so kasch die Hitzwälle no vertraage,
bivoor mir ändgiltig im Sand geen go baade.....

*Die ney Waage- und Requisite-Uusstellig
isch bi dr Kasäärne (samt Baizezält)
und die alt Laddärne-Uusstellig
isch allewyyl no uff em Minschterplatz,
vom Määntig znacht, em 1. Meerze,
bis am Mittwoch demorge, em 3. Meerze.
D Wäägeler fraie sich uff lire Bsuech.*